



Орган Лемковского Союза

Пренумерата в краю:
 30 грошей місячно.
 80 „ квартално.
 1.50 „ полрочно.
 3 зл. рочно.
 В Америкі: 1 дол. рочно.
 В Чехословакии:
 2 кор. місячно, 10 кор. полрочно.
 20 кор. рочно.
Ціны оголошень:
 Ціла сторона 120 зл., 1/2 сто-
 роны 60 зл., 1/4 стороны 35 зл.,
 1/8 стор. 20 зл., 1/16 стор. 10 зл.;
 оголошення малы за 1 мм. 20 гр.,
 в тексті 30 гр., перед текстом
 40 гр. При місячном и долгом
 оголошеню значна знижка.
 Конто чекове Нр. 404.155.

Выходит в каждый четверг.

Редакция и администрация в Крыниці. — Адрес „Лемко“ Крыница.

УЖ ПОЯВИЛ СЯ БОГАТО ИЛЮСТРОВАНЬЙ

КАЛЕНДАР „ЛЕМКА“ НА 1938. РОК

Ціна 1 екземпляра календара разом с великым календарем стінным выносит **50 грошей** и кошты пересылкы. При замовленях 10 штук кошты пересылкы поносит администрация ЛЕМКА. Для кольпортеров великый опуст. Замавляти треба в администрации ЛЕМКА, Крыница 2.

Што робити в зимі.

Уж білий сніг прикрыв землю, як перинюм. Отпочиват и гріє ся под ослоном снігу земленька свята, наша кормилица, отпочиват так же по цілорочных трудах и селянин. Остала лем домашня робота, вымолотити собране зеренце, нарубати дров и чистити и прятати лен.

В поли по роботі, коров насти уж не треба, коні стоят дармо при жолобі цілу зиму, от же настає час заслуженого отпочинку, а с ним и нуда. Лем в неділі и в день ярмарку єст кус розрывкы.

Тому и не дивота, же люде тягнут цілыма гурмами на ярмарок до міста. Слота, не слота, сніг, мороз, дождж, болото по коліна, вшитко одно, люде идут до міста. И не по того, штобы продавати, або купувати, бо продавати ніт што, а на купно никто грошей не має.

Идут там, штобы плянтати ся по под ноги оден другому, штобы побесідовати, по жартовати и штобы веселійше перешол оден день в тыждні, бо и так остає ище 6 дней нудных и монотонных.

А преця в зимі можна собі так урядити, штобы не лем не нудити ся, але вытягнути є долгих зимовых вечеров користь для себе. В инших порах року селянин єст так занятый роботом, же, хоц бы аж и хотіл, не має часу на того, штобы прочитати книжку и газету, має однак на того дост часу в зимі.

Прото тыж в зимі повинни оживити ся всі читальні по селах. Вмісто сідити в хаті и нудити ся, молодеж повинна сходити ся в читальні, (можна приходити так же с кудеями) и надробити того, што занедбало ся в літі.

В читальні найде ся пожиточна книжка, найде ся газета и они дадут молодежи приятну и пожиточну розрывку. Притом можна приго-

товити представлєне, концерт, або иншу импрезу. Час перейде втотчас користно, мило и пожиточно.

Человік родит ся вправді со свойственныма єму замилованями, прикметами и вадами. Видимє нераз, же уж малы діти рвут ся до книжки, инши до майстеркы, инши ище до рысунков и т. д.

Але велику ролю отграват у людеи так же привычка. Человік, котрый каждого дня ходит до читальні, привыкат до того и єго там так тягне, же не потрафит высідити в хаті, а коли там почує, або сам прочитат одну и другу занимаючу річ, набєрат охоты до читаня и читат чим раз больше.

Читаючы пожиточны господарскы книж-

кы, довідує ся, як господарят люде в инших краях, якы мают є господарства доходы и заохочєный тым робит сам ріжны пробы и вводит господарство на рациональны торы.

От же книжка не лем не приносить селянам шкоды, але наоборот, она єст им конче потрібна, бо освідомлят их о том, што діє ся вокрут них и што треба робити, штобы удержати ся на том самом господарчом уровні, на котром стапули наши близини и дальши сусіды.

А до того надає ся передовсем зима є єй долгыма вечерами. Тоты вечеры, повинна сельска молодеж выкористати для власного образованя. Най не думат никто, же кто скончил школу, посіл уж всі розумы. Школа дає лем початок знаня, котре через ціле житє треба поширяти, а том дальшом житєвом школом сут читальні им. М. Качковского и инши культурно-освітны организации и товариства.

ОТПРУЖЕНЄ В ИСПАНИИ.

Англицка дыпльомация и навязанє через Англию безпосередных переговоров с представителями ген. Франко довели до отпруженя положєня в Испании.

Ген. Франко вскріпил через того сильно свое положєне тым больше, же в найблизшом часі має Япония и други державы узнати єго правительство.

Франция має так же охоту навязати переговоры с ген. Франко. Не хотят лем до того допустити крайны-лївы отламы социалистыч-ной партии и комунисты.

Червєны перенєсли столицу с Валенци до Барцельоны, котра выдає им ся безпечнійша от Валенци, окруженой со всіх стран минами, отрізуючима місто от моря. На фронтах на разі єст спокойно, але здає ся, же єст то тишина перед бурьом.

Войска ген. Франко закончили приготєв-леня до новой атаки. Спряже она є с собом по обох сторонах около 700 тысяч войска. Правительствоны войска ждут на атаку, котра віроятно буде найсильнійша со всіх, якы мали місце в домашной войні в Испании.

Бельгия не може выбрати правительства.

Уж от перєцлю трьох неділь в Бельгии вы-бирают новє правительство и не могут єго вы-брати.

Король Леопольд хотіл мати новє правитель-ство ище перед своим выїздом до Лон-дона, але видячи, же не даст ся того перепро-вадити, отложил справу выбору до своего по-вороту.

Через тот час рядит старє правительство фан Зеелянда.

Дальши розстрілы в Совітах.

Сталин, червений диктатор Совітов, запроваджен в Росии порядок и лад принятым раз способом. Тепер „робит“ выборы, усуваючи с пути всіх „врагов“ народа, саботажистов и контрреволюционеро.

По выстреляню цілою „елиты“ с ленинских часов, по выстреляню найбільших героев домашней войны, пришла черга на их наследников, котрых не даст ся вычислити.

„Последнія Новости“, газета, редагована в Парижі, подае, же положене комисара заграничных справ ест сильно загрожене с причины оскарженя цілого ряда советских дыпломатов о зраду.

Найбольшу сенсацию выкликал арест советского амбасадора в Берлині, Юренева, котрого оскаржено о уявнене советских тайн войсковых Японии в том часі, коли Юренив был амбасадором С. С. С. Р. в Токио.

Кромі Юренева арестовано советского амбасадора в Турции Карского, бывшего амбасадора советского в Польці Давтияна, посла в Ковні Подольского, посла в Рыгі Бродовского и посла в Гельсингфорсі Асмуса.

Посол в Талині Устинов в день одержаня возваня до Москвы застрелил ся.

Арестованы дыпломаты сут оскаржены о участь в заговорі, в котром мал принимати участь также оден дыректор департамента в комисарияті заграничных справ в Москві Фехнер.

Поданный выше спис не вычернуе числа откликанных в последние часы до Москвы и арестованных советских дыпломатических урядников.

С Гельсингфорса откликано также Иванова, с Людова Антипе-Чекунского, Сивкова, Чорного и Шустера, котрого уж в Москві арестовано.

В вязниці находит ся также бывший заступник комисара заграничных справ Крестинский.

Во Франции выкрыто великий заговор фашистовский.

Во Франции полиция выкрыла тайну организацию, зложену с крайне-правых партий, котра приготавлила ся до обаленя теперешного правительства и до запровадженя фашизма во Франции.

Организация распоряджала великыма финансовыма средствами, о чом свидчат величезны магазины машинных карабинов, иного

„Известия“ доносят, же арестовано также в Росии 5-ох православных епископов и одного архиепископа. Газета не подае назвиек.

Тото все доказуе, же в Росии маот уж люди дост большевицких порядков и же цілы Совіты сут покрыты сітю заговоров больших и меньших.

На разі Сталин нищит их, мучачи их по криминалах и стріляючи на право и на ліво. Але чи не прийде такой час, коли не буде кому стріляти, бо всі отвернут ся от Сталина?!

Фашизм в Бразылии.

Недавно ище Бразылия была тереном тяглых безпокойств. Комунисты, хоц урядово не мали власти, рядили там, як хотіли. Штрайки были там на дневном порядке, а населене политыковало и уряджало віча, вмісто взяти ся до уцтвовой работы.

Наконец сприкрито ся тото населеню и перед выборами на президента, теперешный президент Бразылии, Варгас зробил переворот, в часі котрого войско без одного выстріла заняло всі правительственны будынки.

Правительство на приказ президента отсрочило сейм и сенат. Вечером оголошено нову констытуцию, котра дораз стала ся обовязуюча. Надав она Бразылии, помимо оставленя форм республиканских — сильне правительство.

Такым способом тота велика держава о пространстві 9½ милиона квадратных километров ввошла в круг народов фашистовских.

Переворот тот ест великом втратам для держав демократических як Злучены Державы Поли, Амерыкы, Франция и Англия, и великым успіхом для Німеччины и Италии, котры, яко фашистовскы, сподівають ся тягнути великы користи с того великого и богатото, але мало промышленного краю.

оружия и амуниции. В звязи с тым арестовано там много людей на высоких становисках.

Газеты заходят в голову, кто давал гроши на приготвлене той революции, котра была бы напевно выбухла, если бы полиция не посчастлило ся выкрыти заговора.

Найдену амуницию оціняють на перешло миллион франков.

На третьом фронті — шанхайском — японскы войска ведут бои коло Нантао.

Причином тых неудач кытайских войск ест зла организация и брак дысципліны. Пододынокы вожды кытайских войск не все подчиняють ся приказам Чанг-Кай-Шека, а гдеякы с них отступили его с многотысячныма армиями.

Чанг-Кай-Шек вірит однак в окончательну победу своих войск и не хоче приступити до непосредных мирных переговоров с Японией, жадаючи рішеня sprawy в рамках пакта 9-ох держав.

Гдеякы газеты нищут, же Чанг-Кай-Шек с розмыслом впуцат японскы войска в глубину краю, штобы ослабити их через занадто долгу линию фронта и знищити так, як тото зробила Росия в р. 1812 в войні с Наполеоном.

Суд засудил редактора „Нашого Лемка“ на 4 місяцы ареста, 50 зл. гривны и зворот коштов.

В Окружном Суді в Сяноці закончил ся процес, веденый О. Сов. Йоаном Полянским против М. ТАРАНЬКЫ, ОТВІЧАТ. РЕДАКТОРА мазепинской газеты „НАШ ЛЕМКО“ в обиду чести.

О. Сов. Полянский выточил М. Таранькови процес о клевету и очернене его в газеті „Наш Лемко“.

На першой судовой росправі во Львові Таранько заявил, же все, што написал „Наш Лемко“, ест правда и што он переведе доказ правды. „Правду“ тоту мали доказати свидкы, яких Таранько подал аж 12-ох.

Суд переслухал всіх свидков, меже нима 8-ох священников, але они не потвердили Тараньковой „правды“, в виду чого Суд станул на точці, же „Наш Лемко“ очернил и оклеветал О. Совіт. Полянского и выдал вырок, за суджающий Таранька

НА 4 МІСЯЦЫ АРЕСТА

(без завішеня и без заміны на гривну), на зворот коштов и на 50 зл. гривны.

Таранько зголосил апеляцию.

О. Сов. Полянского заступал адвокат мгр. Осиф Перелом. Таранька боронил украинский адвокат Др. Блавацкий.

Домова выправа заячих и кролячих скор.

Кролячи и заячи скоры маот найвысшу вартость в зимі, коли футерко звірят ест густе, тепле и пушисте. Прото, в місто продавати их ріжным гандлярам, лучше выправити их в хаті и сужити на потребу свою и дітей.

Тоты легкы и барз теплы футерка надают ся знаменито на кожущкы для дітей, шапки, коліны, а также под гуні для старших.

Выправа скор не ест трудна, можна их легко домовым способом аж и забарвити на черно, если вымагат того потреба.

Скору заячу, або кролячу, перезначену до выправы, пристераме на дощечці, серстю до дощечкы и смаруеме так зробленом течом: 100 грамов галуны, 1 столова ложка кухонной соли и оден литр воды вариме разом. Коли теч выстыне и ест ледо літна, смаруеме ньом скоркы и одночасно скрепчеме с них оболону острым ложечком. Робиме тото в теплі, коло пеца.

Очищену таким способом скорку треба оставити на дощечці, штобы ся не скорчила при сушеню. По трьох днях знимае скорку с дощечкы и гнетеме ю старанно в руках так долго, аж стане ся совсем мягка. Пак звывае ю в катульку, серстю до середины. Выправлены и позвиваны скоркы треба овинути папером, обвязати мотузком и повісити в сухом місци так, штобы не достали ся до них мыши.

Скоркы так выправлены можна фарбовати на довольну барву, можна их также стрічи и втотчас наслідуют они ріжны гатункы футер.

Война на Далеком Востоді.

Война меже Кытаем и Японией приносит дальши успіхы Японии.

Шанхай, бороненый по геройскы через кытайскы войска улят перемочи сил японских. Фронт пересунул ся о парудесят километров за місто, котре поза меженародным кварталом представлят образ нужды и знищеня.

Тысячи кытайского населеня схоронило ся на терен меженародной концессии. Японскы войска надыбали лем роскладаючи ся труны, голод и нужду.

На фронті Шанси по заняту Тейвану японскы войска посувають ся на полудне, вышераючи кытайцов.

На другом фронті — шантунском — японскы аеропляны бомбардуют міста. Японскы войска приближают ся до Жолтой рікы (Гоангхо).

ПОМІЩАЙТЕ
ОГОЛОШЕНЯ
В ГАЗЕТІ „ЛЕМКО“.

Заосмотренє пасікы перед зимом.

Зачинат ся зима с ей холодом, вітром, морозами и снігом. Человік забезпечат ся перед зимом, придаючи для себе теплу одеж и заосмотряючи хату перед зимом. Заосмотряют ся также на зиму всякы сотвореня. Одны робят тото сами, другим мусит помочи в той роботі человек.

Пчолы, живучи дико по лісах, уміют сами заосмотріти ся в дудлах дерев на зиму, але держаны в уліях, затратили уж самоохоронный инстинкт и прото человек мусит прийти им с помочом.

Помоч тота єст тым больше потребна, же пчолы, яко овады, живот коротко, и уж само пережить дост долгого зимущного часу являт ся чимси противным натурі овадов, тынучих звичайно перед зимом.

Пчолы могут однак зимувати совсем добре в уліях на поли и не заходит потреба будовати для них отдільны шоны (стебники), ходит лем о тото, штобы улии были добры.

Треба отже точно оглянути улий и всі шпаны залішити глином, штобы до середини не доставал ся мороз. Збиты в клубок пчолы дают достаточну теплу и свіжий воздух, достачуций ся через вылет, пчолам не пошкодит.

Если стіны улия суг дубельтовы, то по заціщеню шпаны, улий такый можна оставити спокойно цілу зиму в том самом місци, где стоял он в літі. Як стіны улия суг зроблены с одной дощкы, а до того тонькы, в таком разі треба улий окрутити соломом, листем, або сіном, бо иначе пчолы могут в зимі замерзнути.

Особенно старанно треба заосмотріти дах, штобы до улия не текло, бо вода, достачуяча ся до улия, може знищити и найсильнійший пень.

Улий повинен быти сухий и теплый. Добре єст отже давати на верх рамок старый, выпранный мішок, выпханный січком, або половом и так прикроеный, штобы тісно входил до улия и штобы меже мішком и стінами улия не было нияких шпаны.

Штобы с такого заголовка не порошила ся січка, або полова, верх рамок прикрывае фалатком густого полотна и на тото полотно кладеме заголовок.

Вылет треба поменьшати на 2 пчолы, а як

єст зимно, то на 1 пчолу. Цілковито замыкати вылету не можна, бо пчолы потребуют также свіжого повітря. Прото тыж треба уважати, штобы сніг, який задержує ся на вылетной дощці не замкнул вылету, бо пчолы с браку повітря могли бы ся подусити.

Треба также памятити о том, штобы пчолы мали дост меду на зиму. Много пасічників поступат так, што в осени заберат пчолам праві вшиток мед, а на весну дає пчолам цукор.

Така практыка єст однак барз неперва. В зимі пчолы праві совсем не потребуют корму, але на весну, як потепліє, особенно по облєті и выпорожненю ся, корм єст им конче потребный.

Если отже пасічник не уловит момента и не подкормит пчол в отвітный час, може ся легко притрафити, што пчолы згынуг с голоду. Прото тыж пернійше єст, если пасічник оставит пчолам мед в осени на зиму. На сильный пень числит ся 15—16 кг. меду, треба отже оставити в улий 8—10 рамок с медом.

Если пчолы мають добре заосмотреный улий и до волі меду, то напевно передержат они и найострійшу зиму.

Соленє рыжиков на зиму.

Дуже смачном и здоровом стравом, а на жаль у нас, по селах мало ужываном суг накышены рыжикы.

Перебраны и очищены рыжикы по обрізаню хвостиков, мечемє на кыпячу воду и заваряе оден раз. Заварены цідїме через сито и як обсохнут, укладаме в деревляной дїжечці, в глиняном, або в каменном горщи сподом до горы. Кажду верству рыжиков треба добре посолити. Коли зложит ся всі рыжикы, прикладат ся их денком и каменьом и устаєят в холодном місци. Як рыжиков убуде, можна докладати свіжи.

Так насолены рыжикы перед ужитєм обмыват ся в холодной воді и крає. Покраины укладат ся на тарель, поливат оцтом и, кто любит, додає крайной цыбулі. Суг они смачном приправом до мяса, а также могут быти ужиты в пості до груль и хліба.

Ардан буде засідати на троні с „відкрійськима” министрами и буде мати свою „вікраїну”, а тепер ми рускы Ждыняне не мусимє го слухати и дати ся єму дурити.

Дня 31. жольтня 1937 р. наш „вітець” мал в церкви проповідь и дуже выхвалял Дионисия Голода, який недавно помер в Америкі, што он был свідомый „вікраїнець” и што ся старал вшиткыма силами, жебы на нашой Лемковщині была „Вікраїна” бо мы всі были „вікраїнцями”.

Мы ждыняне Голода лучше знаме чим вы, бо мы с ним были в Америкі и нераз зме с ним говорили и знаме, яким он был, то он не был жадным „відкраїнцом”, лем такым як мы греко-католиками и коли бы был „відкраїнцом” то бы не выслал грошей в 1935 р. до своей родины, штобы на его ґрунті поставили трираменный крест в Лузі коло дороги на „копцах”.

Читали сте наш „вітченьку” его лист, який сте достали три літа тому назад, то вы не мали часу его перше прочитати бо сте были самы, а тепер мате сотрудника, то сте его прочитали, бо мате больше часу.

Читали сте што он прислал 100 злотых на читальню „Просвіта”, то чом сте не збудовали

„Просвіту” закаль он ище жил, аж по его смерти голосите, то ся вам добре голосит бо он не чув, и не може заперечити.

За его гроши пренумеровали вы рускым газдам в Ждыні самы „вікраїнські” газеты, жебы сте их попереверодили на „вікраїнців”, одному сте слали цілый рок „Коровячу Справу” и так не зробили сте с него „відкраїнца” и сте го зтягли до процесу, же ваш ліє ужыват, а тепер ся шкрябете по бороді як видите же проґрате, кажете што коли бы сте о том знали, же его свідкове так заприсяжуг, же ліє его, то бы сте го не скаржили.

А прєця он вам повідал, же так тримат по своем отци, а свідкове вам также повідали, што то єст его власность. Видно забыли сте, же сами кричали сте в церкви на проповіді, жебы ся люде не скаржили, бо на том лем адвокаты зарабляють, бо сами дали сте примір людем, як мають поступати.

Не чудовало бы нас, як бы вы не мали своего ліса, але мате го дост, рубате, коли сами хочете и николи не завідомляте консисторию, ци вам каже рубати, чи нїт, а як вам голыси дозволили то лем стары матки, а вы запродали Олінероги найкрасни молоды ялицы, бо он старых не хоче.

Того самого дня 31. X. 1937 на проповіді сте кричали штобы люде не читали криницкоґо „Лемка”, лем жебы го палити, а лем жебы читали самы вікраїнські газеты. А чом? Бо „Лемко” не иде разом с нима и не помагат им украинцям лем им шкодит.

Але шкода ваної бесіды, бо мы ждыняне знаме чого ся тримати маме.

Ждыняне.

Чудачны рыбы. В стоячих водах Бразылии и Венезуелі в Америкі Полудневой живот барз цікавы рыбы. Суг то угоры, доходячи до 2 и пол метра долготы и до 30 см. грубости. Отличають ся они тым, же их тіло єст наладоване електричностю.

Електрична сила у тых рыб єст так сильна, же потрафит она звалити с поґ найсильнійшого мужчину, як доткне ся его така рыба. А коли рыба ударит мужчину пару раз хвостом, потрафит его спарализовати (поразити), подобно як перун.

Часты случаи утопления в стоячих водах Бразылии и Венезуелі находят свое выясненє власне в тых свойствах чудачных рыб. Рыбы тоты называють „електрычныма”.

Научны баданя над тыма рыбами выказали, же рыбы тоты мають дар порозумівати ся меже собом. Коли нпр. надыбане в воді звіря єст занадто отпорне на електричний ток и коли удар одной рыбы не може его поразити, и тотчас, як бы на якийси знак угоры со всіх стран, окружають бідне звіря и убивають.

Асекурація от лысины. Тепер выдумуют асекураційны т-сва што раз новы способы асекурации. Коли давнійше можна ся было асекуровати лем от огня, граду и т. д., то тепер можна ся асекуровати от всего.

В Лондоні отворило недавно одно асекураційне т-ство новый отділ, а именно асекурує оно от лысины. Оплата єст невысока, бо товариство хоче спопуляризовати тот род асекурации.

Перед асекураціом каждый убезпечающий ся мусит показати свои волосы. Коли волосы му выпадут и на голові пояєит ся лысына, заасекурованому выплачат товариство суму грошей, на яку заасекуровал ся убезпечающий.

За допись редакция не отвітат.

Со Ждыні повіта Горлицкого.

Недалеко Яворины и Дуявы єст розложене красне горске село Ждыня.

Перед войном было в Ждыні пару рускых установ, як молочарня, каса, читальня им. М. Качковского и кооператив „Руска Сила”, котры дуже красно розвивали ся и были приміром для других сел Лемковщины, был и священник, який дружно трудил ся со своимы парохиянами.

По войні всео ся змінило: молочарня розлетіла ся, каса и кооператив так само пропали, а читальню закрыли австрийскы власти. Читальню отновлено аж в 1930 році, яка тепер досыть добре розвиват ся и котра стоит солю в очах нашому „вітцику відкрійськови” Волод. Арданови, котрый всіма силами старат ся ю повалити, а на ей місце штобы повсталла якась „Просвіта”.

Каже, што просвіта аж бы отворила очи нашому темному Лемкови и он познал бы, же ся має тримати „відкрійськів”, але „просвіта” в Ждыні буде аж товды, як наш „вітець” В.

Што чути в світі и в краю

Раз ужили сой на вині. Малий остров Гернсей, положений меже Англиом и Франциом мала недавно не бодай яку гостину. Вода вышмарила на берег пару тузинов бочок с вином, походячих с розбитого корабля, котрый затопил ся недалеко острова.

Населене острова почало пити без памяти. Цілий остров был пьяный. Не обышло ся и без биток и авантур, котрым конец положила аж полиция, накладаючи высокы кары на переходящих вино с затопленого парохода.

Великы катастрофы самолетны. Недалеко Варшавы мала місце велика самолетна катастрофа. Самолет летячий с Кракова до Варшавы хотіл опустити ся на земле и завадил о електричны проводы (дроты), котрых летчик в густой гмлі не виділ и упал на земле, розбиваючи ся.

В катастрофі згинуло 4-ро людей, а 7-ро ест тяжко раненых.

Друга самолетна катастрофа мала місце недалеко Остенды, где также опадаючи на земле в барз густой гмлі летчик завадил о фабричный комин, западил ся и згоріл.

Всі находячи ся на самолети спалили ся. Под остатками розбитого самолета найдено 11 сугленых трупов. Серед убитых находит ся кн. Юрий Геский, его мати княгыня Елеонора Геска, его жена, и его два сыны, 6-літний Ернест и 4-літний Александер. Княжа родина їхала с Німеччины до Лондына на шлюб кн. Людовика Геского, котрый мал ся оженити с дочком брытійского фабриканта.

Кромі княжой родины згинули в катастрофі: шамбелян геского двора барон Ридель цу Айзенбах, инж. Маритенс, служаща княжной, летчик, радиооператор и механик.

На два дни передом розбил ся также самолет в Америкі, где в катастрофі згинуло 9-ро людей. Во всіх трьох случаях причиною катастрофы была барз густа гмла.

Смерть Рамзея Мак - Дональда. В часі подорожи до Злученых Держав Америкы Полночной умер на удар сердца трикратный премьер Англии, Рамзей Мак - Дональд. Мак - Дональд походил с бідной рыбацкой родины и через свою вытревалость, знаня и организациный дар добил ся найвысших достоинств в державі.

Последный раз уступил он с премерства в р. 1936 и от того часу не занимал ся уж политыком. До Америкы хотіл выхати, штобы усунути ся цілковито от политычной діяльности и жити там спокойно на старость. Умер в 71 році жия. Тіло его похоронено в родинных гробах.

В Австрии выкрыто тайну комунистычну организацию. Власти австрийскы выкрыли тайну комунистычну организацию, котра вербовала охотников и высылала их на фронт до Испани. Проводыром той организации была вїденска комунистка Меляния Ернест, жена доктора.

Арестовано 40-ро людей. Тайна комунистычна организация мала до роспорядимости великы финансовы средства и много авт, котрыма перевозила охотников через границу.

Страшна буля на Филипинах. Над столицем Филипин (островы коло Азии) Манильом

и поблизкыма округами перешла страшна вітрина буля. Вітер позривал дахы с хат и погыривал дерева с коренями. На дорогах видно погыертаны самоходы. Злива, товаришача вітрови, залила місто. Великий англицкий пароход сорвал ся с анкров и был шмареный о берег. Маса людей стратила жите в той бурі.

В Німеччині не можна їсти свіжого хліба.

В Німеччині робит ся все, штобы лем было як найбільше грошей на арматы и кулі. По ограниченях консумции омасты пришла черга на хліб, звычайный, штоденный хліб. Власти выдали заряджене, вызываюче население до купования и консумции хліба зачерствілого и чорного, выходячи с основаня, же їджене хліба свіжого ест марноване Божих даров, тым больше, же хліб зачерствілый, а до того чорный, ест найздравший. Поручено также замінити хліб пшеничный на мішаный, або чисто житный. Склепы, котры будут продавати хліб свіжий, наразят ся на высокы кары. Так то в Німеччині ест и постно и голодно, але не бракуе на кулі и арматы.

Б. цисар Абисынии в нужді. Бывший абисынский цисар Гайле Селязие живе в Англии в великом домі, котрый купил, як опустил Абисынию. Дом ест великий, але в нем студено, бо ніт грошей на топливо.

Негус живе с остатков капитала, який утікаючи с Абисынии забрал с собою и тепер тот капитал ест уж на вычерпаню. Прото негус посит ся с наміром продати дом и замешкати в меньшом вынанятом. При негусі живе 22-е людей. Ест то его родина и прислуга.

Вчасна зима в Канаді. С Канады доносят, што в провинции Онтарио и инших місцевостях веходной Канады выпал уж місяц тому глубокий сніг. Сніг падал также в Торонті и в американском стейті Нью - Йорк, где завадил дорогы меже Сираказами и Портлендом.

В гдеяких місцевостях (Питерборов) был уж сильный мороз.

Борба с очными хворотами в школах. Школьны власти (Куратории) выдали обіжник в справі лікарских оглядин в народных школах. Вєих дітей с першой класы маюг оглянути лікары - окулисты и провїрити, чи не сут они хворы на трахому (египетске запалене очей), котра ширит ся серед школьной молодежи.

Страшне несчастье в Японии. Убочи гор Канаши обсеудили ся и засыпали цілу фабричну осело. Земля засыпала будынок дыретици и фабричны будынкы копальні соли, 5 будынкы и 300 горников и урядников копальні. Одночасно выбухла сірка и склад выбуховых материялов. Втраты в людях и материялі величезны.

На Воляни сут ище лірники. Часы, коли діды с лірами были неотлучными товаришами всяких забав, весіль, крестин и т. д., належат уж до минувшости. На Воляні живе ище старый дід, лірник Прокон, котрого можна видіти на торгах Луцка, або Кременца. Сідат он под стїнами хат и своим дыржачом и скостенілом от холода руком бренкат на лірі, старой може, як и он сам, стары думкы... о княжной, што утопила ся в Стырі, о славном збойнику Івані, о замку Любарта...

Лем часом дае ему дакто грош даякый. О лірника - діда никто не дбае. Радио и грамофон выхали го гет со своих хат. Новы часы, новы зрычан.

Молодой, кваліфікований инструктор - организатор хоров, мандолиновых оркестр, театральных кружков и т. д., глядат занятя. Условиа по умові. Може предложити рекомендации читалень.

Адрес: ДЖУРИН (пов. ЧОРТКОВ)
МИХ. КРИЖАНОВСКІЙ.

Потребный от зараз хлопец до науки кравецтва, лем талантливый и маючий охоту до той работы. Може быти также розуміючий ся уж на шитю. Условиа приняты — по договору.
АНТОНІЙ АНДРЕЙЧИН — УСТЕ РУСКЕ.

В Редакция „Лемка” в Крыниці можна достати ріжвы книжочки религийного содержания.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ

ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО.

НЕХАЙ ЯКНАЙСКОРШЕ

за асекуруе ся
в асекурацийном Товаристві
ВИТА И КРАКОВСКЕ
во ЛЬВОВІ

Асекурацию принимают на цілой Лемковщині
представителі: гг. Осиф Ямовицкий — Крыница - Село
и Михаил Перелом — Сянок.